

NORMATIVA DE RECOÑECIMENTO E TRANSFERENCIA DE CRÉDITOS PARA TITULACIÓNS ADAPTADAS AO ESPAZO EUROPEO DE EDUCACIÓN SUPERIOR (EEES)

Preámbulo

A Lei orgánica 4/2007, do 12 de abril, que modifica a Lei orgánica 6/2001, do 21 de decembro, de universidades (BOE 13 de abril) dálle nova redacción ao artigo 36 da LOU, para pasar a titularse *Validación ou adaptación de estudos, validación de experiencia, equivalencia de títulos e homologación de títulos estranxeiros*. Na nova configuración da LOU séguese mantendo a existencia de criterios a que se deben axustar as universidades, pero neste caso estes criterios van ser fixados polo Goberno, a diferenza do sistema actual, en que a competencia lle corresponde ao Consello de Coordinación Universitaria.

A LOU introduce tamén como importante novidade a posibilidade de validar, para efectos académicos, a experiencia laboral ou profesional, seguindo os criterios e as recomendacións das declaracións europeas para 'dar adecuada resposta ás necesidades de formación ao longo de toda a vida e abrirse a quen, a calquera idade, desexen acceder á súa oferta cultural ou educativa', como sinala a súa exposición de motivos.

En desenvolvemento da LOU no Real decreto 1393/2007, do 29 de outubro, que establece a ordenación das ensinanzas universitarias, aparece un novo sistema de validación de estudos denominado recoñecemento de créditos e introdúcese o concepto de transferencia de créditos. Este Real decreto na súa introdución e nos artigos 6, artigo 12.8, artigo 13 e na disposición adicional cuarta desenvolve estes conceptos. Así mesmo di que, co obxecto de facer efectiva a mobilidade dos estudantes, as universidades elaborarán e publicarán a súa normativa de recoñecemento e transferencia de créditos, con suxeición aos criterios xerais do devandito Real decreto.

Na memoria para a solicitude de verificación de títulos oficiais (anexo I do Real decreto 1393/2007) deberá constar o sistema existente na Universidade da Coruña (UDC) de transferencia e recoñecemento de créditos.

Por todo o anterior é necesario regular o procedemento que debe seguirse na UDC.

A definición do modelo de recoñecemento non só é de importancia capital para os alumnos que desexan acceder a cada titulación, senón que ten as súas raíces na propia definición da titulación, que debe ter en conta os posibles accesos desde outras titulacións tanto españolas como estranxeiras.

A proposta de regulación ten as seguintes bases:

- Un sistema de recoñecemento baseado en créditos (non en disciplinas) e na acreditación de competencias.
- A posibilidade de establecer, con carácter previo á solicitude dos alumnos, táboas de

recoñecemento globais entre titulacións, que permitan unha rápida resolución das peticións sen necesidade de informes técnicos para cada solicitude e disciplina.

- A posibilidade de especificar estudos estranxeiros susceptibles de obter recoñecemento toda vez que se acceda aos estudos de grao, mestrado ou doutoramento.
- A posibilidade de recoñecer outros estudos e competencias profesionais acreditadas.

Artigo 1: recoñecemento e transferencia de créditos

A unidade de recoñecemento e de transferencia serán os créditos, sen prexuízo de poder recoñecer ou transferir disciplinas, materias ou módulos completos. No expediente do alumno figurarán como créditos recoñecidos ou transferidos. Os créditos recoñecidos teranse en conta para os efectos de considerar realizados os créditos da titulación.

O *recoñecemento de créditos* supón a aceptación pola UDC dos créditos que, de ser obtidos en ensinanzas oficiais, na UDC ou noutra universidade, son computados noutras ensinanzas distintas para os efectos da obtención dun título oficial.

A *transferencia de créditos* supón que, nos documentos académicos oficiais acreditativos das ensinanzas seguidas por cada estudante, se incluírán a totalidade dos créditos obtidos en ensinanzas oficiais cursadas con anterioridade, na UDC ou noutra universidade e que non conduciran á obtención dun título oficial.

Todos os créditos que obteña o estudante en ensinanzas oficiais cursados en calquera universidade: os que supere para a obtención do correspondente título, os recoñecidos e os transferidos, serán incluídos no seu expediente académico e reflectidos no Suplemento Europeo ao Título.

Artigo 2: criterios de recoñecemento de créditos

Os criterios xerais de recoñecemento de créditos son aqueles que fixe o Goberno. A UDC mediante esta normativa e as resolucións reitorais que a desenvolvan establecerán o sistema para o recoñecemento destes créditos. As titulacións poderán propoñer criterios específicos adecuados a cada titulación que serán aprobados por resolución reitoral. En todo caso deberán respectarse as seguintes regras básicas para as ensinanzas de grao:

- a) Sempre que a titulación a que se pretende acceder pertenza á mesma rama de coñecemento que a de orixe, serán obxecto de recoñecemento os créditos correspondentes ás materias de formación básica da devandita rama.
- b) Serán tamén obxecto de recoñecemento os créditos obtidos naquelas outras materias de formación básica pertencentes á rama de coñecemento do título a que se pretende acceder.
- c) O resto dos créditos poderán ser recoñecidos pola UDC tendo en conta a adecuación entre as competencias e os coñecementos asociados ás restantes disciplinas cursadas

polo estudante e os previstos no plano de estudos ou ben que teñan carácter transversal.

- d) O recoñecemento a que fai mención o Artigo 12.8 do Real decreto 1393/2007 será obxecto dunha regulamentación específica na UDC.

Artigo 3: sistema e procedemento para o recoñecemento e transferencia de créditos

- 3.1. Para determinar o recoñecemento de créditos correspondentes a materias non recollidas no artigo 2.a) e 2.b) teranse en conta os estudos cursados e a súa correspondencia cos obxectivos e competencias que establece o plano de estudos para cada módulo, materia ou disciplina. A universidade dará validez, mediante o acto de recoñecemento, a que o alumno ten acreditadas competencias da titulación e o cumprimento de parte dos obxectivos desta nos termos definidos no EEES.
- 3.2. Para estes efectos, cada centro establecerá táboas de equivalencia entre estudos cursados noutras universidades e aqueles que lle poderán ser recoñecidos no plano de estudos da propia universidade. Nestas táboas especificaranse os créditos que se recoñecen e, de ser o caso, as disciplinas, as materias ou os módulos equivalentes. Se o recoñecemento non é total, indicaranse os requisitos necesarios para establecer a súa superación completa.
Igualmente estableceranse táboas de equivalencia entre titulacións correspondentes a ordenacións de ensinanza anteriores ao Real decreto 1393/2007.
As táboas aprobaranse por resolución reitoral a proposta da Xunta de Centro.
- 3.3. A UDC poderá recoñecer directamente ou mediante convenios, titulacións estranxeiras que dean acceso a titulacións oficiais da UDC ou establecer neses convenios o recoñecemento en parte de estudos estranxeiros. A UDC dará adecuada difusión destes convenios.
- 3.4. Ao alumno comunicánselle os créditos recoñecidos e o número de créditos necesarios para a obtención do título, segundo as competencias acreditadas e segundo os estudos de procedencia do alumnado. Tamén poderá especificarse a necesidade de realizar créditos de formación adicional con carácter previo ao recoñecemento completo de módulos, materias ou disciplinas. Os créditos recoñecidos incorporaranse ao expediente xunto coa calificación obtida na universidade de orixe.
- 3.5. O procedemento iniciarase por instancia de parte, salvo o previsto no parágrafo 3.3, no centro en que o alumno vai iniciar ou continuar os estudos que pretende recoñecer, mediante a presentación dunha instancia, dirixida ao decano/a, director/a do centro, en que figurarán os seus datos persoais, así como os estudos de que procede e aqueles que desexa recoñecer.
- 3.6. Desconcéntrase nos decanos/as, directores/as de centro as seguintes competencias:
- a) Recoñecemento dos créditos de materias recollidas nos artigos 2a) e 2b) desta normativa ou nas táboas de recoñecemento. A solicitude, unha vez revisada pola

Administración do centro, se resolverá no prazo establecido na Normativa de Xestión Académica correspondente a cada curso.

b) No resto dos casos o Decano/a, Director/a, tras a revisión da solicitude pola Administración do centro e co informe vinculante da Xunta de Centro (ou da Comisión en que teña delegadas esas competencias), resolverá as solicitudes no prazo establecido na Normativa de Xestión Académica correspondente a cada curso.

3.7. No que corresponde a transferencia de créditos, todos os créditos obtidos en ensinanzas oficiais cursadas na UDC ou noutra universidade do EEES serán obxecto de incorporación ao expediente do alumno, tras a petición deste, mediante a presentación dunha instancia dirixida ao Decano/a ou Director/a do centro, en que figurarán os seus datos persoais, así como os estudos de que procede e aqueles que desexa transferir. A solicitude de transferencia de créditos resolverase polo mesmo procedemento establecido no punto anterior.

3.8. A instancia a que se refiren os puntos 3.5 e 3.7 virá acompañada da documentación que proceda, segundo os seguintes casos:

Estudos cursados en centros universitarios españois:

- Certificación académica oficial, en que consten as materias aprobadas e as cualificacións obtidas en cada unha delas, así como o plano de estudos realizado. Así mesmo deberá figurar o número de créditos correspondente a cada materia ou no seu defecto deberá presentarse unha fotocopia do plano de estudos cursados, debidamente asinada e selada polo centro de que proceda o alumno.
- Programas das materias cursadas, excepto para aquelas que se recollen no artigo 2 a) e 2b) que teñen recoñecemento automático.

Estudos cursados en centros estranxeiros:

- Certificación acreditativa do nivel e clase de estudos que se pretende recoñecer.
- Así mesmo, deberá figurar o número de créditos correspondente a cada materia ou no seu defecto deberá presentarse unha fotocopia do plano de estudos cursados, debidamente asinada e selada polo centro de que proceda o alumno.
- Programa das materias en que figura o contido e a amplitude con que foron cursadas.
- DNI ou pasaporte.
- Todos os documentos deberán ser oficiais, traducidos ao galego ou castelán, expedidos polas autoridades competentes e legalizados por vía diplomática se for o caso.

3.9. Contra as resolucións de recoñecemento ou transferencia de créditos previstas nos puntos anteriores poderase interpoñer recurso de alzada ante o reitor no prazo dun mes, quen resolverá logo de informe da Comisión de Plano de Estudos da Xunta de

Goberno da UDC, que terá carácter vinculante.

Artigo 4: recoñecemento doutros estudos

- 4.1. O procedemento e os criterios para o recoñecemento parcial de estudos anteriores aos establecidos no Real decreto 1393/2007 (diplomado, licenciado, arquitecto, enxeñeiro ou equivalentes) en titulacións adaptadas ao EEES seguirán o establecido nesta normativa.
- 4.2. Conforme os criterios e directrices que fixe o Goberno e o procedemento que fixe a universidade poderán recoñecerse, para os efectos académicos, a experiencia laboral ou profesional.

Artigo 5: taxas

Polo recoñecemento de créditos de estudos realizados aboaranse, se for o caso, as taxas que para cada curso académico sexan fixadas polo correspondente Decreto da Xunta de Galicia. As taxas faranse efectivas nos centros en que o alumno vaia iniciar ou continuar os estudos segundo o procedemento vixente en materia de pagamento de prezos por servizos académicos universitarios, no prazo máximo de dez días a partir da recepción da notificación da correspondente resolución.

Disposición adicional

Facúltase ao reitor ou vicerreitor/a en quen delegue para o desenvolvemento desta normativa.

Disposicións transitorias

1. A validación e a adaptación de estudos para titulacións non adaptadas ao EEES seguirá rexéndose pola normativa destes estudos.
2. A validación de estudos nos programas oficiais de posgrao desenvolvidos ao abeiro do Real decreto 56/2005, do 21 de xaneiro, e modificado polo Real decreto 1509/2005, do 16 de decembro, regularase pola presente normativa.

Disposición final

A presente normativa entrará en vigor ao día seguinte da súa aprobación polo Consello de Goberno da Universidade.